

## I. DISPOSICIÓN XERAIS

### MINISTERIO DA PRESIDENCIA

**5032** *Real decreto 330/2009, do 13 de marzo, polo que se modifica o Real decreto 1311/2005, do 4 de novembro, sobre a protección da saúde e a seguraza dos traballadores fronte aos riscos derivados ou que poidan derivarse da exposición a vibracións mecánicas.*

O Real decreto 1311/2005, do 4 de novembro, sobre a protección da saúde e a seguraza dos traballadores fronte aos riscos derivados ou que poidan derivarse da exposición a vibracións mecánicas, supuxo a transposición ao dereito español da Directiva 2002/44/CE do Parlamento Europeo e do Consello, do 25 de xuño de 2002, sobre as disposicións mínimas de seguraza e saúde relativas á exposición dos traballadores aos riscos derivados dos axentes físicos (vibracións), e foi publicado no Boletín Oficial del Estado o día 5 de novembro de 2005.

A directiva, aplicable ás actividades en que os traballadores estean ou poidan estar expostos a riscos derivados de vibracións mecánicas como consecuencia do seu traballo, establecía no seu artigo 3 os valores límite de exposición e os valores de exposición que dan lugar a unha acción, tanto para a vibración transmitida ao sistema man-brazo, como para a vibración transmitida ao corpo enteiro. No artigo 5.3 especificábase, ademais, que «os traballadores non deberán estar expostos en ningún caso a valores superiores ao valor límite de exposición», e engade que «se, a pesar das medidas adoptadas polo empresario en aplicación do disposto nesta directiva, se superase o valor límite de exposición, o empresario tomará de inmediato medidas para reducir a exposición a niveis inferiores a ese valor límite. Así mesmo, determinará as causas polas cales se superou o valor límite de exposición e modificará en consecuencia as medidas de protección e prevención, para evitar que se volva superar».

Pero a mesma directiva establecía un período transitorio respecto ao cumprimento do disposto no mencionado artigo 5.3, baseado no recoñecemento de que determinados equipamentos non permiten respectar os valores límite de exposición, debido fundamentalmente a dificultades tecnolóxicas. Así, no seu artigo 9 especificaba que «no que respecta á aplicación das obrigas previstas no punto 3 do artigo 5, os Estados membros, logo de consulta aos interlocutores sociais de acordo coa lexislación ou os usos nacionais, poderán dispoñer dun período transitorio máximo de cinco anos a partir do 6 de xullo de 2005 cando se utilicen equipamentos de traballo que se puxesen á disposición dos traballadores antes do 6 de xullo de 2007 e que non permitan respectar os valores límite de exposición, tendo en conta os últimos avances da técnica e/ou a posta en práctica de medidas de organización. En canto aos equipamentos utilizados nos sectores agrícola e silvícola, os Estados membros poderán prorrogar ata catro anos o período transitorio máximo».

Pola súa vez, o Real decreto 1311/2005 establece no seu artigo 3 os valores límite de exposición e os valores de exposición que dan lugar a unha acción, tanto para a vibración transmitida ao sistema man-brazo, como para a vibración transmitida ao corpo enteiro, conformes cos determinados pola directiva. Ademais, o artigo 5.3 do real decreto especifica, da mesma maneira que a directiva, que os traballadores non deberán estar expostos en ningún caso a valores superiores ao valor límite de exposición. En caso de que se supere o valor límite de exposición, a pesar das medidas adoptadas polo empresario, este deberá adoptar as disposicións oportunas para reducir a exposición a niveis inferiores a ese valor límite, determinando as causas que deron lugar a esa superación e modificando as medidas de prevención e protección de maneira que se evite esa superación.

Á hora de determinar os períodos transitorios, a norma española de transposición optou por non esgotar inicialmente os prazos establecidos pola directiva. En efecto, no

momento de levar a cabo a transposición, tanto durante os traballos preparatorios da norma española en que se recibiron informes sobre esta cuestión por parte dos diversos departamentos ministeriais con competencias na materia, como posteriormente, durante a fase de consulta aos interlocutores sociais, acordouse que a norma española de transposición non abranguese todo o período transitorio ofrecido pola directiva para o cumprimento do artigo 5.3. Porén, co obxecto de non perder a opción dos períodos transitorios que a directiva concede, dada a posibilidade de que nos períodos establecidos polo real decreto os avances da técnica e as medidas de organización seguisen sen permitir o respecto dos valores límite, o real decreto estableceu que o Goberno, á vista dos estudos realizados polo Instituto Nacional de Seguraza e Hixiene no Traballo, e logo de consulta ás organizacións sindicais e empresariais máis representativas, procedería á modificación do real decreto determinando a data de aplicación das obrigas previstas no punto 3 do artigo 5, para o que podería prorrogar os prazos ata os permitidos pola directiva.

Pois ben, vencido o prazo establecido na disposición transitoria única e valorados os estudos técnicos elaborados polo Instituto Nacional de Seguraza e Hixiene no Traballo, así como as consideracións realizadas polos departamentos ministeriais afectados, conclúese que non todos os equipamentos de traballo postos á disposición dos traballadores do noso país antes do 6 de xullo de 2007 están en condicións de permitir a aplicación do disposto no real decreto respecto dos valores límite, o que obriga a prorrogar os prazos a que se refire o parágrafo primeiro da disposición transitoria.

Na elaboración deste real decreto foron consultadas as organizacións empresariais e sindicais máis representativas e oída a Comisión Nacional de Seguraza e Saúde no Traballo.

Na súa virtude, por proposta dos ministros de Traballo e Inmigración e de Sanidade e Consumo, coa aprobación previa da ministra de Administracións Públicas, de acordo co Consello de Estado e logo de deliberación do Consello de Ministros na súa reunión do día 13 de marzo de 2009,

#### DISPOÑO:

**Artigo único.** *Modificación do Real decreto 1311/2005, do 4 de novembro, sobre a protección da saúde e a seguraza dos traballadores fronte aos riscos derivados ou que poidan derivarse da exposición a vibracións mecánicas.*

A disposición transitoria única do Real decreto 1311/2005, do 4 de novembro, sobre a protección da saúde e a seguraza dos traballadores fronte aos riscos derivados ou que poidan derivarse da exposición a vibracións mecánicas, queda redactada da seguinte maneira:

«Disposición transitoria única. *Normas transitorias.*

Cando se utilicen equipamentos de traballo postos á disposición dos traballadores antes do 6 de xullo de 2007 e que non permitan respectar os valores límite de exposición tendo en conta os últimos avances da técnica e/ou da posta en práctica de medidas de organización, as obrigas previstas no artigo 5.3 non serán de aplicación, nos termos do artigo 9 da Directiva 2002/44/CE, do Parlamento Europeo e de Consello, do 25 de xuño de 2002, sobre as disposicións mínimas de seguraza e saúde relativas á exposición dos traballadores aos riscos derivados dos axentes físicos (vibracións), ata o 6 de xullo de 2010 e, no caso particular dos equipamentos utilizados nos sectores agrícol e silvícol, ata o 6 de xullo de 2012.

O Instituto Nacional de Seguraza e Hixiene no Traballo, como órgano científico-técnico especializado da Administración xeral do Estado, no exercicio da súa función de investigación, estudo e divulgación en materia de prevención de riscos laborais de conformidade co artigo 8 da Lei 31/1995, do 8 de novembro, de prevención de riscos laborais, deberá realizar antes do 31 de decembro de 2011 estudos técnicos

especializados en materia de vibracións mecánicas nos sectores agrícola e silvícola, tendo en conta o estado da técnica e a experiencia obtida noutros Estados.

Á vista de tales estudos, o Goberno, logo de consulta ás organizacións sindicais e empresariais máis representativas, procederá á modificación deste real decreto para determinar a data definitiva de aplicación das obrigas previstas no artigo 5.3 nos sectores agrícola e silvícola, e poderá prorrogar para estes sectores os prazos a que se refire o parágrafo primeiro desta disposición transitoria nos termos do artigo 9 da Directiva 2002/44/CE, do Parlamento Europeo e do Consello, do 25 de xuño de 2002, sobre as disposicións mínimas de seguranza e saúde relativas á exposición dos traballadores aos riscos derivados dos axentes físicos (vibracións).»

**Disposición derogatoria única.** *Alcance da derogación normativa.*

Quedan derogadas cantas disposicións de igual ou inferior rango se opoñan ao disposto neste real decreto.

**Disposición derradeira primeira.** *Título competencial.*

Este real decreto dítase ao abeiro do previsto no artigo 149.1.7.<sup>a</sup> da Constitución española, que lle atribúe ao Estado competencia exclusiva en materia de lexislación laboral.

**Disposición derradeira segunda.** *Habilitación regulamentaria.*

Autorízanse os ministros de Traballo e Inmigración e de Sanidade e Consumo, no ámbito das súas respectivas competencias e logo do informe da Comisión Nacional de Seguranza e Saúde no Traballo, para ditaren cantas disposicións sexan necesarias para a aplicación do establecido neste real decreto.

**Disposición derradeira terceira.** *Entrada en vigor.*

Este real decreto entrará en vigor o día seguinte ao da súa publicación no «Boletín Oficial del Estado».

Dado en Madrid o 13 de marzo de 2009.

JUAN CARLOS R.

A vicepresidenta primeira do Goberno e ministra da Presidencia,  
MARÍA TERESA FERNÁNDEZ DE LA VEGA SANZ